

*Eco el segno!... In sto momento  
I se mola, poverazzi!  
Bepo, Bepo, daghe drento  
Ti ga forza, e mi lo so;  
Bianchi e forti xe i to brazzi  
Cussì bei mi no li gò.*

*L'è dei primi... adesso el passa  
Me fa el sangue un mareselo,  
Lo cognosso a quella fassa  
Che per lu gò recamà:  
Oh! no falo, dal batelo  
Per vardarme el s'à voltà.*

*Go pontà mi stessa al fianco  
Quella fassa cussì sguarda,  
Mi vestio lo gò de bianco  
Ch'el me par un zensamin.  
Voga, zogia, che te varda  
La to Nina in terazzin.*

*Fate onor: che quela dona  
Benedeta de to mare  
In sto ponto ala Madona  
Do candeles gò impizzà:  
Pensa al stato de to pare  
Che tre primi el ga ciapà.*